

徒橫行于天下。此種題目。最中都人士意。左亦銳意發奮。以雪前辱。加以新七聲。援勸彌誇耀。觀者倚疊如山。既而鼓笛嘔啞之聲。絃歌春融之響。喧于滿場。柝鳴帳啓。左團錦袍繡袴。腰佩雙刀而出。鮮麗奪目。舞蹈中規。折旋中矩。臺詞一聲。洞徹場內外。衆喝采不已。曰於戲高島屋。終至與團十菊五。三分鼎峙。割據爭雄。不亦忍耐自彊之功乎。後勸彌逋負谷量。討鬼寇至。困于葛藟于腕腕。左團分擔其半救之。新七已沒。有一女。視猶同胞。敬之愛之。皆所以不忘其恩也。左團次名榮字松蔦。稱高島屋。

恕軒氏曰。余嘗品評左之技。曰。紆餘淡宕。簡勁峭拔。團有此簡勁峭拔。而無此紆餘淡宕。菊有此紆餘淡宕。而無此簡勁峭拔。況能孝于親。不忘恩誼乎。夫士之成就一藝。未爲易也。而逢知己尤難矣。左團次巧則巧矣。然不逢新七勸彌。則末齟之淨丑耳。嗚呼。今世無復新勸其人。也。

雖有左團。不可如何。慨然久之。

甘藹先生傳

甘藹先生。其先曰蕃薯。呂宋人。明萬歷中。始入漢土。爲野侯之將。伐取青芋。侯封以閩粵蕃薯卒。葬于臺灣之野。子孫移琉球。先生蕃氏七世後。自稱甘藹。性博愛救衆。元祿中來朝于我。賜地薩摩。後移武之川越。天保中歲歉。乃遊江戶。寓於康衢。揭小牌曰煨薯。聲名隆起。婦女往焉。媪婆往焉。書生往焉。僧侶往焉。鰥寡孤獨無告窮民。免溝壑之瘠者。先生與有力焉。先生色紅白。質淡泊。不解飲。能容婦人小子。婦人小子最親先生。呼曰阿薩。小姐低聲命婢曰。亦買阿薩來。晝日三接。先生性廉直不貪價。有索必往。小兒啼。母騙之曰。阿薩來阿薩來。無不止者。青木昆陽與先生友善。嘗嘆曰。凡有罪非死刑者。遠放之島嶼。要在使其終天然耳。然諸島少五穀。常以海產木實給食。是以往往不能免餓死。豈



不亦痛哉。可救之者。莫先生若焉。乃薦先生。果有功。著蕃薯考一編。行於世。余幼貧。辱知於先生。屢仰其救。先生不我遐棄。倍蓰其數。不問值。曰。夫子尙有陳蔡之飢。豎子其忍焉。嘗遇諸塗。余問前程。曰。八里半。蓋比栗輸一著云。性嗜畫。尤好寫山。如佛掌薯。人皆笑之。先生曰。吾有所受之也。

恕軒氏曰。昔人有言。使朱薯如玉山之禾。瑤池之桃。人以爲不老不死之仙藥。真然。癸亥夏五。余拉穉女。遊目黑村。展甘藷先生墓。卽昆陽塋域也。墓在丘林中。艸木叢茂。絕無香花跡。子孫存亡不可知矣。及觀牡丹於內田園。少過其節。魏紫姚黃。皆已凋落。富貴不可賴如此。爽然自失。強傾數盃而去。

陳碧城七絕

菊池晚香選

雪中過虹橋。

玲瓏玉樹冷棲鴉。多少紅樓近水涯。一路畫簾寒不卷。隔牆香出白梅花。

玉女池。

上古瑤池近翠微。青冥鸞鶴幾時歸。西峰璧月如明鏡。曾照當年舊羽衣。

曾見瑤壇集萬靈。臨波彷彿照媼姪。一池倒影天如水。夜夜長明玉女星。

題天門壁。

元氣茫茫眼底收。芒屨踏徧萬峰秋。題詩更與仙人約。訂取他



年五嶽遊。

秋日雨中過西華潭。

西華潭路接銅街。玉螭微波水一涯。秋雨瀟瀟人不見。滿隄黃葉落宮槐。

空庭獨立偶書所見。

秋陰如夢紫苔肥。雨後新涼試袂衣。墮葉無聲簾不卷。斜風滿院白蛾飛。

贈如意館畫士。

大纛高牙十萬師。征西諸將捷書遲。凌煙有閣無人上。閒煞丹青筆一枝。

擬唐人塞下曲讀劉昫舊唐書作。

萬里秋風一夕生。邊人牧馬夜無聲。茫茫青海連天碧。一角龍

駒島上城。

萬里無塵靖朔風。七星橫絕夜當空。燭龍洲畔龍銜燭。弓月城

邊月挂弓。

萬重翠嶂雲中落。一綫黃河天際來。昨過燕然都護府。單于秋色滿高臺。

將軍三箭定天山。渡海樓船劍氣寒。已破蓋牟降僞薩。傳烽一

夜達長安。

玉門關外柳千條。春入桃花叱撥驕。一自金城公主過。長條爭學內人腰。

處密師連撥換城。安西四鎮詔移兵。玉關楊柳天山雪。併入龜

茲籬裏聲。

戊校屯兵蹟未孤。華容公主玉顏殊。高昌兵馬如霜雪。抵得唐



家日月無。

常山小憩試茗

茆屋疎林坐曉煙。閒中清味亦堪憐。誰將龍井山中茗。來試狼河塞外泉。

寓齋詠菜萸花。有懷舍弟甌江。

灤水西頭葦峪雪。甌江東畔海門沙。五千里外空回首。愁看菜萸一翦花。

出阜城門。

十里長河繞苑牆。高粱橋畔柳成行。西山一夕濛濛雨。洗得綠陰如水涼。

曉過趙北口。

毵毵髡柳未垂條。雙淀生煙澹不消。霜氣欲流沙雁語。疎星殘

月十三橋。

元夕旅舍題壁。竝寄都中諸故人。

關山浪蹟感浮名。已過華年百感生。匣底芙蓉秋一握。夜寒猶作玉龍聲。

簫鼓西城日暮天。別來初見月輪圓。有人畫壁春燈夜。細數征程到酒邊。

漂母祠。

一飯艱難我亦愁。千金言報笑韓侯。英雄失路知多少。漂母祠前野水流。

曉臥有作。

淮水東來第幾程。中流安穩布帆輕。峭寒如水春如夢。臥聽篷窗掃雪聲。



客都下者六載。到家未及兩旬。即赴皖江。書此志感。

風裏飛花水上萍。迴腸輪轉未曾停。關山歸後江湖去。始信前身是客星。

書隨園詩集後。

花月江山筆一枝。牧之心蹟似微之。君生太早吾生晚。惜未空

山禮導師。

抹倒韓蘇論太偏。朝天一集或隨肩。性靈兩字精微甚。祇恐刀

圭誤後賢。

蕭娘湖。

齊梁宮殿總荒基。春水蘭陵又一時。六代繁華銷不盡。蕭娘湖

上雨絲絲。

題卞敏畫蘭用彭甘亭韻。

殘香如夢澹冰綃。想見妝成彈燕髻。寫罷春痕寫秋影。銷魂月

上海棠梢。

花落亭皋怨舊根。渡江桃葉感朱門。嬋媛大有靈均意。一幅瀟

湘染淚痕。

羅袖人歸夢雨天。尙餘殘墨出蒼煙。梅邨樂府纏綿甚。同在龍

華小劫前。

燕支湖。

半篙新漲欲生波。淺碧無痕研越羅。一夜東風吹短夢。燕支湖

上落花多。

白紵山。是桓溫攜伎歌白紵處。

北伐雄心氣未磨。枋頭師敗恨如何。登臨大有新亭意。一角青

山白紵歌。



白紵聲停拂舞衣。煙江柳色定依依。琅邪年少難重見。太息金城已十圍。

未降中朝九錫文。同時王謝定無倫。若教垂暮酣歌舞。文景何嘗解笑人。

中年哀樂須陶寫。絲竹閒情未許刪。攜伎林泉寫高致。後來祇有謝東山。

旅夜不寐。書寄吳門。

門外橫塘碧水流。微波瑟瑟泊蘭舟。板橋西去斜陽路。一樹桃花幾白鷗。

謝家池館綠陰殘。竹樹蕭蕭弄晚寒。花影滿身人振盞。月明先上舊闌干。

即目。

黛痕潑水綠陰肥。古木澄潭鏡翠微。幾點蘋花香漠漠。青山影裏白鷗飛。

龍池飲馬。池在五梁郭外三里。

山影涵空綠潑醅。鱗鱗莎草短于苔。十年踏徧長城窟。又向龍池飲馬來。

岸邊水蒨花。有作褪紅色者。娟楚可愛。竟日舟行其下。為賦。 櫓聲搖夢入蒹葭。瘦影娟娟映淺沙。小雨不成天欲暮。鏡中初試淡紅花。

奚鐵生為余寫憶花圖。今七年矣。偶檢書篋得之。因題。

張園斜日樹陰寒。人去樓空感墜歡。滿地青苔可憐色。更無人倚畫闌干。

橫春橋北玉泉西。盡日無人鳥自啼。惆悵湖陰弔香冢。落花如



雨溼春泥。

雨中望九峰。

遠樹橫雲溼翠重。晚天澹墨暈芙蓉。扁舟人在江南岸。暮雨瀟瀟暗九峰。

水繪園雜詩。

敗葉填池水不流。更無殘礎況層樓。名園寂寞詞人老。回首人間二百秋。籛雅新編見逸才。梅庵憶語月徘徊。褪紅衫子流黃簾。曾見嬋娟小影來。秣陵高會憶河橋。黨籍清流禍不消。滿地斜陽兩人影。香南雪北話前朝。

吳祭酒楊農部約同鄧尉探梅適以海上之行不果。

眼前蹤蹟半仙凡。翦燭親題寄一函。不向湖陰踏香雪。卻從海上挂春帆。

農部文章祭酒詩。牧之才調似微之。酒邊唱到西洲曲。應與離人寄一枝。

十年塵夢壯懷銷。又趁長風泛沅瀟。一角青山萬梅樹。相思夜夜託春潮。

以海水滌硯系之以詩。

合喚天池作墨池。匣中紫氣潤紅絲。一泓更注滄溟水。好寫東坡海外詩。當年攜汝渡灤河。滌罷隄糜手自磨。憐汝生平共辛苦。又從海上浴鯨波。

聞雁。



一繩征雁下遙灘。有客孤舟仰面看。莫趁長風更東去。暮潮初落海門寒。

烏衣故國路漫漫。社燕將來祇合還。一樣歸程各辛苦。我浮江海爾關山。

湘玉為余錄海上遊草。因題卷端。

狂濤日夜盪心魂。銀燭春寒泊海門。憐爾妝臺眉子硯。櫻桃微雨寫黃昏。

紫塞黃河盡舊遊。又從海上泛孤舟。玉臺宮體休相例。中有滄溟萬古愁。

粉圍香陣擁詩城。花月江南過一生。龍女鮫人盡瑤想。神仙那得更如卿。

夜過松陵。

澹墨香殘絳蠟銷。夜天星斗共迢迢。櫓聲如雁春寒重。寂寞松陵十四橋。

蔣園雜詩。題小樓壁。即以留別。

笛聲吹月過迴廊。花影紛紛滿畫牆。坐到疎星下樓角。綠陰如水羽衣涼。

百年喬木絕棲鴉。不覺清陰易日斜。松影滿池苔滿地。惜無仙鶴守梅花。

雨絲風片不須愁。芳樹簾櫳夏似秋。昨向辛峰亭上望。春陰如夢罩紅樓。

碧瓦銅溝別院門。藏春仙館夢留痕。平泉花木無人記。可惜南沙宰相孫。

夢中紀遊。



鵝鼻山前汗漫遊。白蘋花碎綠蘿秋。臥看翠壁紅樓起。身在滄江一葉舟。

揚節鎮。招陪劉軍門樓船夜讌。

劉章按劍親行酒。揚僕橫戈夜扣舷。記取春江花月夜。將軍與我謙樓船。

暮雲消盡海天青。夾艦魚龍水氣腥。何物尊前堪下酒。囊中一卷握奇經。

簫鏜聲裏騁雄談。風雨橫飛酒半酣。正是瓊娘籌海日。羽書飛過大江南。

水仙樓櫓尚紛紛。瓊海烽煙暗陣雲。迴首粵南天萬里。一杯遙酌李將軍。

歸去嚴城玉漏催。吳淞水落暮潮迴。海門一片青天月。曾照將

軍武讌來。

題萬花小隱印章後。

武林舊事載。西湖北山有萬花小隱園。是南宋謝太后故宅。余欲買山而隱。犀泉謂余。既以西溪為漁隱。宜以西湖為花隱。因作小印見貽。既訂耦耕。兼盟息壤。余名場跌蕩。媿非高臥元龍。宦海浮沈。已作倦游司馬。懷舊撫今。不能無感。因口占二十八字。并乞犀泉。鐫之左方。

江南佳麗情無限。宦海波瀾感未終。何日扁舟竟歸去。一盒小隱萬花中。

聞雁。有懷梅庵宮保塞外。

一聲嘹唳撥雲開。知爾新從塞上來。戈壁秋風青海雪。征人應過白龍堆。



商聲簌簌驚秋老。殘雨瀟瀟坐夜闌。瘦影一燈心萬里。玉門關外不勝寒。

秋夜江上。

星影參差漢影斜。夜深殘月亦清華。一江秋露明于玉。絡緯聲涼出豆花。

讀邵堯夫擊壤集。即效其體。

春鳥秋蟲盡可聽。角端蠻觸且消停。世間何者為恩怨。大海風吹幾點萍。  
雁齒平橫玉蝨腰。長檣鐵鹿阻乘潮。從知世路無通塞。舟小篷低易過橋。  
何妨與世共推移。消息盈虛互有之。明月圓時萬人見。海潮長處百川知。

澹澹春陰漠漠苔。嫩晴天氣偶然來。百花都在春風裏。紅紫憑他各自開。  
名場宦海兩無涯。一笑浮生井底蛙。各有因緣莫相問。神仙飲酒佛拈花。

病中頗有所悟。偶書六首。即寄松壺。

年來久已息飛騰。定裏分明見佛燈。回首空山坐秋樹。前身原是壑庵僧。  
小豹嬌愁孔雀仙。蒼猿馴擾鶴翩跹。三生石上曾相識。更伴清遊四十年。  
十載長安歎轉蓬。半生江表感疎慵。何年歸臥僧廬下。飽聽南屏寺裡鐘。  
蘭陔侍膳步花林。繙到楞嚴日未沈。滿地松陰滿池水。在家無



異出家心。

百年名輩半凋零。招隱淮南賦未成。祇有松壺老居士。肯來聯

榻聽松聲。

山水方滋見逸才。半生殘夢入天台。看雲聽瀑無窮事。更向深

山采藥來。

月夜聞紡織聲。

銀漢斜臨海上城。露團庭綠夜涼生。豆花籬落秋如水。處處西

風絡緯聲。

病起見新綠。

小庭新綠已如潮。桐葉成陰柳帶飄。隔著疎簾玩清影。一春花

事此中消。

載酒江湖事有之。茶煙輕颺鬢成絲。年來已醒樊川夢。任爾成

陰子滿枝。

幾生彌勒許同龕。學到安心睡定酣。一角南屏山下路。綠陰如

水有茆庵。

舟中口號示同濟者。

駭浪何須問舵師。安心兩字鎮相宜。待他到岸收帆日。便是風

恬浪靜時。

海上夜靜聞龍吟

名場宦海兩浮沈。如此遨遊亦素心。已歷關山看虎蹟。更從滄

海聽龍吟。

貝闕珠宮過一生。長吟何事不平鳴。飛騰伏蟄尋常事。休學潛

蚪作怒聲。

餘響殷殷遠更傳。詩情滄海浩無邊。昨宵夢訪蘇門隱。閒聽鸞



皇嘯九天。

周采巖。爲余作禪悅小影。題詩其後。

海山何事策紅藤。彌勒同龕得未曾。消盡凡心味禪悅。年來已

是在家僧。

僧樓半杵夕陽鐘。夢裏南屏翠色濃。更乞蒲團摹小影。萬峰寒

翠一林松。

舟夜卽目。

哀蟲清響答吳歌。孤枕無聊遣睡魔。涼露欲流天在水。水蕙花

底見明河。

將之白下。留別吳門。

宦興蕭條欲放鷗。半生蹤跡滯江關。暫攜吳苑三秋月。去看金

陵六代山。

江上青山定若何。南朝花月未消磨。板橋雜記秦淮曲。應爲秋

風弔女蘿。

舞袖驚鴻冶袖鸞。不勞書札寄長干。年來花月關心事。都作煙

雲過眼看。

銀河影澹欲橫天。一夕吳中晚唱船。初向秣陵城下去。江東羈

宦十三年。

京口泝江。入新開河。

隔江秋樹有無間。沙柳蕭條未可攀。彩翠滿船天一碧。夕陽影

裏過金山。

句曲道中。望茅山。

茅山周一百五十里。高三十里。初名句曲山。以山形如已字。象其形也。秦時茅盈弟兄三人。得道於此。更名茅山。道書以爲華陽第



八洞天。秦始皇東遊駐此。歎曰。巡狩之樂。莫過於山海。自今以往。良為常也。乃改北垂為良常之山。絕頂宮庭問玉晨。行人指點說茆君。夕陽凝望天如水。一縷華陽洞裏雲。歸去驪山事渺茫。北垂猶識古良常。二千年後青山在。遺址何從弔始皇。鶴唳青天嶺百盤。句容東去是金壇。一從貞白先生住。滿地松風六月寒。學佛何如且學仙。羅姑華姥亦前緣。聽秋高館人如玉。歸隱青山已十年。蔣陵湖上秋荷。綠滿城陰水不波。細雨疲驢人獨立。蔣陵湖

上看秋荷。

題姚雪門媚花簫歌後。

序云。簫為錢塘倪敬堂家所藏。紫竹為之。得之秦淮古塚中。署款曰媚花。蓋舊院諸人物也。

羅裙都化彩雲飄。一曲青溪舊板橋。解與秦淮添本事。埋香塚裏媚花簫。紅闌水榭隔明霞。新柳當窗比歲華。風靜月明人不寐。媚花畢竟媚何花。松壺子。將有嵩洛之行。以自作行看子八幀。索詩為題。聽風聽水下瞿塘。夾岸猿聲嶺樹長。回首峨眉山畔月。半輪秋影入平羌。齋厨煙出萬松陰。何年同入遠公社。日午春



潮聞梵音。

蕉林飲啄澹忘歸。清絕虛堂綠四圍。我亦茶煙有同夢。湖天曠蕩白鷗飛。

與叔美別逾月矣。計程當至巴陵。書此奉懷。

暮郭朝嵐第幾程。江山如畫峭帆輕。君行應過巴陵道。惆悵瀟湘夜雨聲。

草堂舊隱尋陶谷。茆屋前緣夢壑庵。行到巴陵定回首。晚山濃處是江南。

龍江夜雪。書寄玉徽。

十年吳苑領騷壇。水閣題襟感墜歡。今夕龍江關下泊。一天春雪大江寒。

丁字簾在板橋北。用虞山蒙叟丁字簾前是六朝句。題壁。

丁字簾前是六朝。青山人遠白門簾。當窗一樹垂垂柳。苦爲征人繫畫橈。

秦淮流水石城潮。丁字簾前是六朝。昨夜高樓誰擊篴。有人低唱雨瀟瀟。

舊院風流長板橋。水天花月易魂銷。虞山蒙叟今何在。丁字簾前是六朝。

雨中過東花園。林木翳翳潭渚縱橫。傳是青溪九曲舊址。

園樹荒涼暮雨催。雨中黃葉下秋苔。無人解說前朝事。重畫青溪九曲來。

九曲今餘一曲存。舊京遺事最銷魂。萬花樓閣秋陰裏。一抹疎烟白下門。

青山如夢弔前朝。一樣興亡付寂寥。幾點殘鴉畫疎柳。行人指



點苑家橋。

淒涼劍血濺羅裙。絕代蛾眉肯殉君。何處賞心亭子在。春泥來

弔麗花墳。

將歸吳門留別寓樓。

門外湖波是後湖。後湖西去一山孤。何人新建巢居閣。添種梅

花象鶴雛。

慣聽湖雨泛湖烟。雁齒橋邊鴨背船。望見一株銀杏樹。扁舟知

已到門前。

僧廬幽寂暫為家。破曉啼烏薄暮鴉。昨夜秋聲涼到枕。臥聽湖

雨滴蘋花。

船頭魚網尾魚罾。芡葉菱絲滿鏡澄。為是草深魚聚處。四更猶

有打魚燈。

白雲空翠互勾留。一卷新詩在此樓。惆悵暫游還小別。青蘿黃  
葉共千秋。

題潘功甫秋柳詩後。

白隄對面影參差。曾築香泥種幾枝。不寫春痕寫秋影。小青墳

畔雨絲絲。

濃粧洗淨冷煙蕪。何處紅樓憶姓蘇。眉影更纖腰更瘦。天然宜

稱美人湖。

黃鶴樓呂仙像側。有盧生睡像。春泉韻林謂似裴之。感書。

黑甜一枕味遽然。蝴蝶莊周世外緣。同是黃粱炊未熟。盧生夢

醒爾長眠。

紀夢。

九月初五夜。夢見裴之在邗上。為余處分瑣事。甚楚楚。覺其死。問



之。曰然壽盡也。問在何處。曰兒魂長依翁。翁磨墨輒侍側也。既寤思之。豈恐余筆墨失檢。嚙相余耶。抑望余定其詩文也。賦此以誌哀痛。

滿窓寒月夜三更。夢醒依然似隔生。翁但拈毫兒侍側。此言可惜不分明。  
不因文字便因詩。毫枯墨澹人天隔。賸此叢殘筆一枝。  
飽嘗世味卅三年。或有人天未了緣。入世偷教仍此味。不如作佛作神仙。

將旋吳門。留別漢臬。感事紀程。積成篇什。

青鸞閣下經年住。黃鶴樓中幾度遊。滿目雲山滿襟淚。可憐今日是歸舟。

富春凝黛鬱青螺。一卷春舟浸綠波。各有鄉心吾更切。武林山下暮雲多。  
相城宮保舊清門。君是尙書幾葉孫。話到紀群交誼重。梅花東閣最消魂。  
半世心血付奚囊。金粉烟霞字字香。珍重彫蟲梅處士。一函黎棗壓歸裝。  
晴川閣下挂帆行。江水東流無限情。同坐妙蓮花一葉。青山影裡話三生。  
一灘斜日錦文斑。潮落前灘第幾灣。淘盡英雄淘石子。大江東去幾能閒。  
水榭風花往日春。秋燈如影夢如塵。青衫紅粉都零落。爲問南朝更幾人。



題阮賜卿公子後圓曲。

全家白骨劫灰寒。僥倖蛾眉匹馬還。妬婦駭兒竝珍惜。衝冠未必爲紅顏。

分明西子浣輕紗。彷彿虞兮泣暮笳。留得美人香草影。妙蓮紅放竝頭花。

梵香影裏話蒼桑。賸有團泥古佛旁。玉艷花明應更好。當年惜未塑紅粧。

碧雞金馬與招魂。洱月滇雲總夢痕。一首新詩行萬里。小琅嬛勝舊梅村。

四更過小孤山。

長風吹送彩雲間。滿耳驚濤不暫閒。高臥紅船如跨鶴。四更飛過小孤山。

琵琶亭題壁。

三年翠黛春長好。五宿澄波月最華。看慣霓裳羽衣舞。却來江上聽琵琶。

雪堂客散暮雲間。珠海魂歸鶴未還。從古才人多涕淚。青衫何止白香山。

潯陽曉發。

蘆花風急落潮還。隱隱鐘聲積翠間。侵曉一帆江上去。臥看殘月下廬山。

田家鎮口號。

梨花春酒木蘭纓。早雁聲中晚渡江。三面青山半帆雨。一天飛翠濕篷窗。

赤壁。



鼎足三分勢未成。孫曹當日此鑿兵。論功第一黃公覆。却使周郎受重名。  
賦心妙悟入莊周。元鶴飛來一籊秋。從古佳文多適興。不妨赤壁在黃州。

晚過蓮花隄。彌望皆白蓮花。意境清曠。賦三絕句記之。

花農清曠似漁家。荷葉如田抱郭斜。意外清游殊有味。蓮花隄上見蓮花。  
滿身衣染妙蓮香。一路輕風送曉涼。絕似臨平山下過。荷花世界柳絲鄉。  
風裳水佩滿芳洲。花鴨眠漪似白鷗。回首美人湖上路。萬荷花裡一扁舟。

巴園詠橘中仙奕事。

何處巴邛有舊園。橘中之樂比商山。玉塵輸却餐龍脯。歸去青城暮雨間。  
藕絲尋孔修羅入。蓮葉乘風太乙行。我亦有園思種橘。待君來置玉棊枰。

寄題岳陽樓懷呂仙。

玉遂金尊息羽翰。神仙遊戲下瑤壇。生平也有栽花癖。種徧春山白牡丹。  
翰墨煙霞有異香。黃梁熟後乞紅梁。思量四十年來事。已抵封侯夢一場。  
未免浮生惜好春。況因花月戀紅塵。仙山倘縛青鸞帚。他日盧英有替人。  
洞庭湖水拍天浮。東指滄溟話十洲。我欲題詩邀一醉。待君重



過岳陽樓

題花影樓詞

嬌花媚月寫芳春。絕似開元法曲新。畢竟淺斟低唱好。莫將秦  
 柳換蘇辛。  
 桃花烟雨藕花潮。家在紅闌廿四橋。幾點疎星一鉤月。夜深來  
 和玉人簫。  
 十年浪跡悞浮名。一卷烏絲尙有情。我亦江南舊詞客。無人來  
 按紫鸞笙。

題葉小鸞畫

鸚鵡簾櫳識畫樓。舊家門巷感靈修。芙蓉湖水櫻桃雨。一曲瓊  
 雲起暮愁。  
 香奩小印麗紅牙。曾伴仙人萼綠華。一樣驂鸞人絕世。春山何

處葬梅花

曉雨渡江

金山寺裡鐘初動。鐵甕城中夢半酣。獨有歸人閒不得。一帆烟  
 雨過江南。

乙酉冬日題嫺卿女士停琴佇月小影云。一曲紅闌幾點星。  
 玉徽何事與雲停。嬋娟秋思深於水。除却嫦娥不解聽。畫裡  
 園林澹寫秋。舊家池館舊粧樓。雲翹姊妹都仙去。不撫湘絃  
 已欲愁。蓋傷碧梧仙品諸女士之下世也。今重來錢塘。女士  
 復以此卷索詩。再題二絕。即用原韻。

林風閨秀半晨星。華表歸來鶴暫停。莫更湘人奏瑤怨。嫦娥不  
 忍駐雲聽。  
 人過中年便近秋。學仙終日愛居樓。近從靜照參琴趣。已洗凡



心更洗愁。

湖上雜詩

金碧樓臺鏡裏天。江城萬井起春烟。御舟青雀今猶在。回首宸遊五十年。

梅莊園子暮雲停。岳墓南枝古柏青。多少蒼涼南宋感。振衣閒上翠微亭。

零落芳姿盡作塵。湖山春社弔花神。美人已自成黃土。黃土何年更美人。

坐對青山玩玉臺。彩鸞翠鳳恍飛來。羨他小宋風流甚。收拾金閨一代才。

畫筆應知更擅長。淚痕和墨染秋光。彩鸞失偶成黃鶴。愁絕金釵弟子行。

林梅蘇柳近紅樓。嚼蕊吹花寫別愁。一卷新詩飲湖淥。美人湖上美人遊。

紅樓隔水曉煙低。貪看青山過白隄。一夜美人湖上雪。梅花開過斷橋西。

高臥青山白髮生。主人原是舊鷗盟。尊前笑聽蕭奴語。野鴨浮來爲送行。

張子房

烏盡弓藏一例休。韓彭蒞醢更堪愁。特開千古功臣局。辟穀聊爲汗漫遊。



袁簡齋七律

菊池晚香選

題錢璵沙編修峯青草堂圖

祕書遺裔訪湘靈。手帶離騷過洞庭。漢水澹含三楚白。君山分作幾船青。風謠到處書斑竹。煙景歸來上畫屏。此日草堂秋似雪。雲璵蕭瑟共誰聽。

改官白下留別諸同年

青溪幾曲近家居。天許安仁奉板輿。此去好修循吏傳。當年枉讀上清書。三生弱水緣何淺。一宿空桑戀有餘。手折芙蓉下人世。不知人世竟何如。

繞袖爐煙拂未消。征衫還帶五雲飄。江山轉眼離雙闕。風物從頭問六朝。報國文章公等在。出都僮僕馬蹄驕。他時烟雨琴河



外。遠聽鈞天碧玉簫。

落花

江南有客惜年華。三月憑闌日易斜。春在東風原是夢。生非薄命不爲花。仙雲影散留香雨。故國臺空賸館娃。從古傾城好顏色。幾枝零落在天涯。

風雨瀟瀟春滿林。翠波簾幙影沈沈。清華曾荷東皇寵。飄泊原非上帝心。舊日黃鸝渾欲別。天涯綠葉半成陰。榮衰花是尋常事。轉爲韶光恨不禁。

金光瑤草兩三莖。吹落紅塵我亦驚。讓路忍將香雪踏。開牕權當美人迎。蛛絲力弱留難住。羊角風狂數不清。昨夜月明誰唱別。可憐費盡子規聲。

剪綵隋宮事莫論。天涯極目總消魂。旗亭酒醒風千里。牧笛歌

回水一村。遊子相逢終是別。美人有壽己無恩。流年幾度殘春裏。潮落空江葉打門。

到江口

金川門外倚蘭橈。枕上誰家紫竹簫。兩度秋光來白下。一生風味愛南朝。銀砂落日無王氣。血戰餘聲有怒潮。滿眼琳宮好雲物。蘆花剪雪正千條。

紅牆蕭寺小門開。片片斜陽落葉哀。海色夜涼雙雁語。江心人靜一燈來。風搖逆水青天動。鐘打空山白浪迴。擬挾金尊吹玉笛。高歌先上鳳凰臺。

春柳

已讓梅花一著先。尙傳芳訊早春天。驟開青眼如相識。拋得黃金便少年。十里遠遮江店小。半生閒抱酒旗眠。東皇有意相憐



惜。莫使橫陳大道邊。  
裊裊鶯黃帖地柔。鞦韆扶影出牆頭。受風身比羣花活。照水眉  
生滿鏡愁。古渡有誰嘶白馬。酒家無處不青樓。千條萬緒情難  
盡。舞到黃昏尙未休。

淮上中秋對月

長淮波冷碧雲殘。皎皎當空白玉盤。四海共傳斯夕好。八年不  
在故鄉看。銀河有影秋心老。仙露無聲雁背寒。建業風清京國  
夢。一時和酒上眉端。

殘雪

一夕天風洗素粧。六宮粉黛減容光。早教醞釀成霖雨。敢爲飄  
流怨太陽。湘水自沈青玉案。山人還戀白衣裳。遼城鶴去無多  
日。收拾蓬萊萬斛霜。

鬢邊

鬢邊初見一痕絲。對此茫茫事可知。排日急商行樂法。傷春怕  
憶少年時。會須自愛生前酒。難信人傳死後詩。著破阮孚千緉  
屐。果然臣叔不曾癡。

題沈凡民蘭亭卷子有序

凡民與王虛舟裘魯清交最狎。沈王故工楷法。五十二歲時。各臨  
蘭亭一本。互角精能。畫者作流觴曲水。貌三人於其中。亡何魯清  
死。又數年。虛舟死。凡民每哭一人。則跋數語於卷尾。乾隆十六年  
十一月。凡民來白下。出圖命題。余生晚。不獲見裘王兩先生。而其  
時凡民之官建德。余又將赴長安。感三友之多情。逢兩人之將別。  
磨墨愴然。不能自己。

先生垂老淚星星。行篋常携感舊銘。一代交情存筆墨。三人顏



色付丹青。酒杯白社秋來憶。玉笛山陽雨後聽。五十二年鴻爪在。昭陵風雪滿蘭亭。  
浮生難挹魯靈光。風義羊求事渺茫。兩晉書亡王內史。六朝人剩沈東陽。金仙次第辭西漢。宮女憑誰說上皇。惆悵鍾期來海畔。斷琴彈落一天霜。

咏雪

空山雪墜一聲鐘。花落花開萬萬重。窗外亂飛蝴蝶影。客來多帶鷺鷥容。人情應笑青雲改。版籍全歸白帝封。我自瑤臺甘小謫。三年只種玉芙蓉。  
東皇剪水正紛紛。吹上梅花不見痕。但覺關河開曙色。竟忘天地有黃昏。一生影落書窗好。半世身從玉案尊。記得西湖尋酒伴。斷橋西去最消魂。

騎出青天白鳳凰。羅衣誰耐九秋霜。擬張廣廈遮寒士。可有多裘蓋洛陽。蔥嶺風高花不穩。南山樹盡絹猶長。朝來取共寒梅嚼。賤子平生有熱腸。  
愛著羊欣清練裙。畫標自顧也超羣。方圓不定原無我。去住何心只問雲。已畫芭蕉招隱士。更歌黃竹賦從軍。消金帳暖茅菴冷。一樣能來只有君。

秦中雜感

高登秦嶺望褒斜。鐘鼓樓空噪暮鴉。古井照殘宮殿影。書堂吹入戰場沙。賀蘭風信三邊笛。杜曲霜痕九塞花。每欲憑欄怕惆悵。二千年是帝王家。  
天府長城勢壯哉。秋風落葉滿章臺。一關開閉隨王氣。絕頂河山感霸才。安石本爲江左出。賈生偏過洛陽來。漢朝宣室知何



處。金馬門前月更哀。  
一城秋與華山分。骨賣千金馬不羣。燕影尙尋田竇宅。蟲聲如  
弔帝王墳。涼州樂府清商曲。玉女蓮花薄暮雲。惆悵無雙李都  
尉。低頭還盼大將軍。  
連宵擊筑唱嗚嗚。小隊黃鸞逐酒壚。秦代只存明月好。西方偏  
覺美人無。山尊白帝都朝嶽。客到咸陽怕作儒。李子黑貂裘已  
敝。書燈空照塞雲孤。

杜牧之墓

蕭郎白馬遠從軍。落日樊川弔紫雲。客裏鶯花逢杜曲。唐朝春  
恨屬司勳。高談澤潞兵三萬。定論揚州月二分。手折芙蓉來酌  
酒。有人風骨類夫君。

與郭鳳池侍講秦淮話舊作

當頭新月墜纖纖。十二年來吏隱兼。人似孤鴻雲聚散。詩如老  
將律精嚴。黃梅雨久秦淮闊。紅藕花深畫舫添。料得憑欄定含  
睇。六朝春在水精簾。

贈吳將軍

天威西討莫離支。有詔將軍匹馬飛。萬種頭顱堆甲帳。九邊風  
色試征衣。能教鐵勒驚三箭。不用官兵殺一圍。半夜雪花如掌  
大。硬弓還射白狼歸。  
金川誰築受降城。單騎從容自請行。潑水刀光迎上客。吹燈虎  
穴聽鼾聲。捧盤香火朝穆耳。傳箭江山夜罷兵。椎盡肥牛三百  
隻。歸來殘月在西營。  
閃閃紅旗海色開。妖星半夜掃龍堆。闔門泥首張嬰出。滿耳夷  
歌朱輔來。旅矢長韜還武庫。金瘡不裹上雲臺。男兒此處難消



受。天子親斟酒一杯。

尊前老去霍嫖姚。能說單于謁渭橋。百戰餘生依膝下。五湖歸計趁春潮。黃金甲冷斑衣煖。烏鳥情深劍氣消。只恐雲中需魏尚。未容採藥戴金貂。

題陳古漁詩卷

新詩一卷勝方干。當作楞伽靜夜看。孔翠屏開花爛漫。清商琴老調高寒。地當六代悲歌易。胸有千秋下筆難。我學王戎留贈語。森森更願束長竿。

咏錢

人生薪水尋常事。動輒煩君我亦愁。解用何嘗非俊物。不談未必定清流。空勞姪女千回數。屢見銅山一夕休。擬把婆心向天奏。九州添設富民侯。

詠杖

剡水雙藤健絕羣。偏於花下最殷勤。年來孤往常無路。海內相扶尚有君。小拄心知深淺雪。橫拖身逐往來雲。鄧林豈少狂奔者。可奈虞淵日易曛。

奉和揚州盧雅雨觀察紅橋修禊之作

紫竹亭西歌吹聞。傾城車鬪笛紛紛。楊花風散春隄雪。水面燈涼日暮雲。蕩子黃驄金縷曲。女兒高髻藕絲裙。人間此後論明月。未必揚州只二分。

歐蘇當日擅風流。重整騷壇五百秋。四面雲山新水榭。六朝歌管舊春愁。人騎仙鶴尋詩社。月送笙簫上酒樓。莫怪梅花東閣盛。年來何遜領揚州。

移竹



移取琅玕三五枝。半遮樓閣半臨池。佳人倚袖寒猶薄。高士遷家醉不知。要識虛心隨處好。莫矜晚節出山遲。瀟湘帝子淇園客。忽捲疎簾某在斯。

熊安亭公子之官楚中以舊時松竹讀書樓册子屬題

蕭郎吹笛出南都。肘後離騷有畫圖。行色君山秋月好。書聲江左竹樓孤。詩人慣作州司馬。神女遙迎楚大夫。倘采芙蓉花萬朵。不應忘記白門烏。

答魚門覆舟見寄

久別青琴海上音。忽然彈作水龍吟。文章偶有清流禍。神劍終無化去心。長願伊人歌宛在。何妨與世暫浮沈。水經註疏河渠考。此後輪君閱歷深。

春興

身居宏景三層閣。家住香山八節灘。愁踐落花時讓路。愛生春水獨憑欄。朱藤架老蜂喧早。薜荔牆高蝶過難。呼與園丁作僮約。幾痕新雨試魚竿。

南樓獨坐

清涼山色酒杯邊。身在斜陽小雪天。成佛肯居才子後。爭名難到古人前。萬重白骨堆青史。六代黃金散暮煙。我欲騎鯨遊海上。笑他不達是神仙。

黃河秋決聞陝督尹公移節清江寄呈四首

孤鳳身高易惹風。年年旌節類飄蓬。時當清晏誰聽策。事到艱難始借公。瓠子三秋歌向北。元圭一錫水朝東。相傳迎得司空馬。流出桃花已不同。帝把公當砥柱看。故教赤手障狂瀾。塵談立止黃流濁。犀照應



愁水府寒。上策漢廷推賈誼。遺編唐代重韋丹。華山使者嗟河伯。使我軍中少一韓。  
何處江南非舊遊。兩隄官柳識行騶。廿年故吏知誰在。一局殘棋代客收。元女九天留玉牒。深宮雙箸夾金甌。從今穩上黃麻閣。莫再亭名不繫舟。  
有人黃犢學躬耕。師友關心夢獨驚。細雨春搖芳草軟。孤花寒耐夕陽明。謝安鬚鬢愁來白。疏傅家山老更清。十畝水田三頃竹。知公且自羨門生。

到清江再呈四首并序

枚遁跡隨園。塵思久斷。公手書招之。令沈凡民苦加規戒。類慈母之投杼。誤聞蜚語。如良醫之下藥。未切脈情。恐愛之過深。而知之轉淺。率爾言志。請學仲由。

自愛清溪水最清。忽聞老鳳喚流鶯。商量江上新行李。檢點人間舊姓名。殷浩何妨束高閣。龐公久已事躬耕。夔龍簫管巢由唱。請自分途慶太平。  
一笛斜陽萬木飛。中年哀樂雪飄衣。水邊花淡春將暮。山裏梁空燕獨歸。卓氏酒壚三月斷。鄂君翠被十年違。如何野草鴛鴦夢。尙有襄王說是非。  
每望旌旗洒淚痕。當初薦表苦推袁。想傳衣鉢終無分。賴有文章好報恩。書卷一編常按日。梅花三百自成村。他年李泌金鑾殿。莫說陽城尙在門。  
接得郇公五色箋。敢辭雙槳木蘭船。蒼生望淺人難起。絳帳情深月再圓。白下孤雲芳草渡。龍門高浪夕陽天。可憐桃李青青樹。虛領春風十六年。



送望相公入閣。

平章秋後入楓宸。消息愁教父老聞。朝裏自然需上相。人間未免戀慈雲。當時澤只三江占。此日恩同四海分。儘把嘉謨作辰告。遭逢難得聖明君。  
金陵久住似家鄉。此別知公也斷腸。蕭寺鶯聲何處聽。棲霞山色爲誰蒼。水寬魚忘遊時樂。春好花畱過後香。卅載軍民如一夢。東風吹淚滿甘棠。  
記從弱冠侍蓬萊。老去心情倍愛才。山徑偶然元老至。軍門常爲野人開。牙旗月落宵傳簡。燕寢香凝晝舉杯。此後荒村好風雪。更誰騎馬送詩來。  
驪歌一字一深情。唱到陽關結尾聲。黃閣人行秋萬里。青琴絃斷月三更。重披絳帳知何日。已傍龍門過半生。到底思公公不

遠。中台星照大江明。

聞樹齋侍郎領威遠大將軍印鎮守北路寄詩奉懷  
侍郎持節鎮樓蘭。都護新開幕府寬。我輩尙將儒者待。朝廷久當重臣看。瞻來福相三軍喜。傳出華年九塞譴。立馬天山莫回首。望鄉臺恐在雲端。  
想見趨庭話別離。相公有淚敢輕垂。從來效力沙場日。卽是承權膝下時。充國行軍寧慎重。班超見事勿稽遲。祇今絕域皆州郡。說與呼韓知不知。  
通家有客感離羣。一障乘邊信屢聞。麟閣行看君上畫。燕臺應待我銘勳。新詩勅勒軍中曲。舊夢橫塘水上雲。儻奪焉支好顏色。江南兒女要平分。

送魚門舍人入都



省郎簪筆待彤闈。綵鷁乘風向北飛。深喜故人從此貴。卻憐知己自今稀。長卿家破官裁得。翁子才高願豈違。忍住頭顱未成雪。聖明時際莫言歸。

雲龍踪跡記前因。海內論交子最親。山館夜涼分聽雨。水窗花落共傷春。聯牀尙作同遊夢。上馬頻驚欲去身。此後蕭齋風月冷。再懸陳榻恐無人。

幽燕此去路迢遙。往日鴻泥跡未消。判事莫談溫室樹。遷官穩戴侍中貂。十行漢詔揮新墨。一卷唐詩補早朝。想見上林煙柳外。季良長鬣影飄蕭。

中年容易動深情。況唱驪歌與客聽。折柳路從江上盡。斷腸人對暮天青。霜鴻羽健秋千里。桐樹心孤月一庭。妻子不知緣底事。臉邊來問淚星星。

古琴

箏琶海內傳新曲。禮樂千年剩老身。挂壁尙存清廟夢。過時誰奏廣陵春。敢隨武庫爭高價。只覺羲皇是故人。我不知音偏好古。七條絃上拂灰塵。

答鎮江觀察錢璵沙先生見贈

江頭舊雨作監司。江上閒雲慰夢思。一代交情車笠在。廿年離緒鬢霜知。家焚諫草終存史。身是傳人更有詩。多感瑤華重疊贈。彈琴想爲遇鍾期。

哭聰娘

記得歌成陌上桑。羅敷身許嫁王昌。雙棲吳苑三秋月。竝走秦關萬里霜。羹是手調才有味。話無心曲不同商。如何二十多年事。只抵春宵一夢長。



巫山雲影竟銷沈。神女遺踪尙可尋。侍疾不教衣帶緩。看書常伴燭花深。諸姬學禮推前輩。中饋參謀費苦心。爭奈妙蓮芳少子。半生枯坐淚淫淫。

寄懷梁山舟侍講

早辭金紫昵煙霞。忘卻蕭曹是世家。一飯矜嚴常選客。半生孤冷不宜花。每聞逸事多風義。相別經年感鬢華。難得清明好時節。忽逢舊雨試新茶。

謁史文靖公墓

手供蘋蘩當束脩。先登華屋後山邱。九原尙想師隨會。一疏曾經識馬周。蓋代勳華雲影在。滿堂絲竹水聲愁。知公泉下猶憐我。如此英年也白頭。

白鹿書院

少室山人舊草廬。隔朝換作紫陽居。一松門外張華蓋。五老雲中看讀書。白鹿仙踪流水遠。青衿燈火講堂虛。人間何處尋精舍。稷下淹中恐不如。

謁張曲江祠

天寶當年事漸非。先生進退履危機。篋中秋扇恩難忘。天際冥鴻翼早飛。金鑑果教言在耳。玉環何至淚沾衣。千秋丞相祠堂在。留與行人拜夕暉。



吳穀人七律

菊池晚香選

讀放翁集

鐵馬金戈夢不成。熏爐茗碗寄餘情。蘇黃以外無其匹。梁益之間老此生。擊賊未忘垂釣日。臨終如唱渡河聲。長吟直與精靈接。千億梅花坐月明。

初雪

爬沙一曲譜簾櫳。密灑斜飛態不同。對我青山蒙絮帽。待人粉本畫漁篷。濁醪已長前村價。黃葉纔空昨夜風。報與老農應色喜。鴉娘門外呪年豐。

觀夜潮

高樓極目大江寬。爲待潮生夜倚欄。隔岸忽沈燈數點。如山湧



到雪千盤。魚龍捲地秋風壯。星斗搖天海氣寒。明日漸低聲已歇。一枝塔影臥微瀾。

雲林寺訪慧朗上人

石頭路滑亦何辭。曳杖來尋瘦阿師。有約白雲迎客起。貪看紅葉到門遲。住山要乞安心法。呈佛何妨本色詩。踏遍松陰欲歸去。泉聲十里晚風時。

春暮東周澄源

三月已半花亂飛。花飛日日漸花稀。白蘋何處風方急。黃鳥不知春欲歸。湖裏外添荷葉小。陌東西夾桑陰肥。斜陽未落光景好。待子來敲白板扉。

湖上觀新綠

畫裏租來弄水船。一枝柔艣綠陰邊。浮煙欲合全湖暝。宿雨初

晴萬樹圓。紫燕黃鸝相對語。餘花晚筍各成妍。春愁獨我難消遣。每到斜陽爲黯然。

雪霽

佳晴物態轉冥冥。畫裏何人屐齒經。老樹悄迷羣鶴白。破窗寒納一峯青。行穿竹塢尋梅隴。溫罷茶瓶續酒瓶。殘滴聲聲敲玉碎。負暄好傍短檐聽。

題趙彝齋雙鈎水仙

茫茫如夢復如煙。流落遺縑四百年。不盡湘雲湘水怨。只憑一葉一花傳。王孫何在空愁絕。帝子凌波亦渺然。回首仙人辭漢日。銅盤清淚尙濺濺。

春草

夢醒池塘幽鳥鳴。滿簾春色映新晴。青袍似我休相妬。白髮如



渠亦易生。楚客工吟遺佩在。王孫不見暮雲橫。憑誰寫向闌干曲。一半煙痕畫不成。

寓齋感懷

瀟灑樓開見畫圖。接天煙水晚模糊。家從前日夢中到。客有一星江上孤。幽鳥不來春已歇。青山無恙骨先癯。補脣晞髮精靈在。我欲雲中拍掌呼。

韓蕲王將臺

野血猶腥舊戰場。誰驅此輩肆猖狂。青山亦墮刀兵劫。白骨終讐花石綱。盜賊有時關氣運。英雄無策救危亡。即看名將中原在。已有柴車北走忙。

湖上看雨

青鞋纔得下琴臺。忽響南山一道雷。雙白鳥邊催陣起。萬荷葉

上聽秋來。涼生漁艇人吹笛。醉倚湖光客引杯。眼底菰蒲蕭瑟易。水龍吟激暮天哀。

江夜

萬峯壁立大江橫。秋色連天露洗清。但覺無船無月載。不知是水是風行。隔汀孤鳥欲同夢。逆浪老魚微有聲。半夜月沈潮又上。漁燈流過蓼花明。

秋闈報罷仍至嚴江諸同好賦詩送別舟中感懷寄舍

寂寞孤舟上瀨時。一燈重讀故人詩。郵程細雨和愁織。水枕新寒祇夢知。潮到回頭隨岸曲。帆當轉腳怕風欹。傷心同作悲秋客。可奈天涯更別離。

綠陰

雨絲吹過晝生寒。一徑陰陰鎖石闌。濃淡似兼煙翠活。淒迷不



待夕陽殘。時聞墜果當塔響。略逗餘花借客看。惆悵年年秋色裏。馬蹄踏碎葉聲乾。

葛嶺

絕壁蒼茫石氣青。舊時師相盛園亭。圖書小押壺盧印。韜略高談蟋蟀經。白雁風來秋易冷。襄城嘖打夢難醒。可憐徹夜笙歌樂。換得杭州曲子聽。

孤山探海

曳杖逋仙墓下來。茫茫古意滿蒼苔。斷雲閒伴鶴無語。深雪不知花已開。山好祇今憐寂寞。影疎令我益徘徊。裏湖多少春風樹。未及詩人此地栽。

宋芝山孝廉畫蓺梅種竹第二圖再送程魚門卜居江寧

生面重開煙雨間。梅香簇簇竹斑斑。人如燕子巢新卜。江有鱸

魚夢早還。名士古來稱白下。全家此去靠青山。廿年氣短長安債。先乞今朝畫裏閒。

題黃仲則遺詩後

謫仙樓上謫仙詩。如此才華可惜之。廿載風花龍出骨。萬言珠玉豹留皮。美人黃土今生歇。才子閒情若箇知。想見一燈秋雨裏。通眉長爪苦吟時。

泛舟入南湖行支港中頗極幽趣

穿橋小艇疾于梭。明滅煙光潑眼過。雙竹罨泥和蜺上。一繩界水種菱多。幽禽夕照黃筓畫。浣女春風白紵歌。甫里卜居應最近。早來此地話煙波。

登吳山

第一峯頭賦大觀。攬身如鶴向空盤。人煙白護千家曉。竹雨青



浮四月寒。鸞鶴清聲隨笛起。江湖豪氣盪胸寬。少年十廟嬉遊處。點筆重教到石欄。

咏白芍藥

一曲新詞唱解紅。萬花高會素心同。擔來清曉豐臺月。洗盡浮華鄭國風。味可破禪情不淺。春當夢尾色先空。膽瓶相對渾如水。珍重頻教下綺櫳。

秋雨庵觀桂

華嚴一卷證前因。彈指樓臺換眼新。金粉畫成秋萬樹。香光涌出佛全身。能生月想延吟眺。略得山情助隱倫。只少晦公參妙諦。茶簾無夢榻生塵。

瓜州

古戍蒼茫不可求。但看殘堞扼中流。淘來折戟猶腥血。吹起寒

潮亦白頭。鷗夢那關千載事。樹聲如訴六朝愁。祇休皂角林邊過。戰骨蕭蕭落日秋。

渡江

東風分與一帆春。照影俄驚老大身。瓜步十年衝雪路。楊花三月渡江人。魚龍煙水看逾闊。金碧雲山畫轉新。欲問真源消息近。乘濤直上卽崑岷。

鍊文捷路終



大正七年四月十一日印刷  
大正七年四月十四日發行



選者 菊池三九郎

發行者 荒川信賢

東京市小石川區音羽町四丁目十一番地

印刷者 渡邊八太郎

東京市牛込區榎町七番地

發行所 東京市牛込區早稻田  
區替東京一二三番 早稻田大學出版部

刷印社會式株刷印濟日



所 捌 賣

---


名 古 屋 市	大 阪 東 區	東 京 京 橋	東 京 京 橋	東 京 日 本 橋	東 京 神 田
星 野 文 星 堂	盛 文 館	東 海 堂	北 隆 館	至 誠 堂	東 京 堂

(肆書地各他其)



322  
198







終